



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“ broj: 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“ broj 96/13 i 89/16) i člana 18. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08), izdajem

### IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2019. GODINU STRANKE ZA BOSNU I HERCEGOVINU

Broj: 03-07-6-1271/20  
Sarajevo, 22. septembar 2021. godine

## SADRŽAJ

MIŠLJENJE REVIZORA .....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS REVIZIJE .....	5
Predmet revizije .....	5
Cilj revizije .....	5
Obim revizije .....	5
4. PRETHODNE KONTROLE I REVIZIJE .....	5
5. NALAZI I PREPORUKE REVIZIJE .....	6
5.1 NALAZI .....	6
5.2. PREPORUKE .....	17

## **MIŠLJENJE REVIZORA**

Služba za reviziju finansiranja političkih stranaka izvršila je reviziju godišnjeg finansijskog izvještaja Stranke za Bosnu i Hercegovinu za 2019. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo izvršili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garanciju da je stranka postupala u skladu sa odredbama Zakona o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

**Revizijom godišnjeg finansijskog izvještaja za 2019. godinu, utvrđeno je da je Stranka za Bosnu i Hercegovinu prekršila odredbe člana 4. stav (1), člana 5. stav (4), člana 6. stav (2), člana 8. stav (1) tačka e i g), člana 11. i člana 12. stav (1) i stav (4) Zakona o finansiranju političkih stranaka.**

**Prema našem mišljenju, osim navedenog, revidirani finansijski izvještaj ukazuje da je Stranka za Bosnu i Hercegovinu u 2019. godini postupala u skladu sa odredbama Zakona o finansiranju političkih stranaka.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je reviziju godišnjeg finansijskog izvještaja Stranke za Bosnu i Hercegovinu za 2019. godinu.

Revizija je preduzeta u skladu sa članom 10. stav (1) Zakona o finansiranju političkih stranaka, članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja za 2019. godinu, Stranka za Bosnu i Hercegovinu se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	4.430,00	1,62
2.	Prilozi fizičkih lica ( 3-a )	601,80	0,22
3.	Prilozi pravnih lica ( 3-b )	0,00	0,00
4.	Prihodi od imovine ( 3-c )	0,00	0,00
5.	Prihodi od dobiti preduzeća u vlasništvu političke stranke ( 3-d )	0,00	0,00
6.	Prihodi od poklona ( 3-e )	0,00	0,00
7.	Prihodi iz budžeta ( 3-f )	269.077,68	98,16
8.	Prihodi od propagande ( 3-g )	0,00	0,00
<b>I</b>	<b>Ukupni prihodi (1-8)</b>	<b>274.109,48</b>	<b>100,00</b>
<b>II</b>	<b>Ostali prihodi i drugo</b>	<b>0,00</b>	<b>0,00</b>
	<b>Izvori finansiranja (I+II)</b>	<b>274.109,48</b>	<b>100,00</b>

U godišnjem finansijskom izvještaju stranka je iskazala rashode u ukupnom iznosu od 254.894,24 KM.

## 2. PREDSTAVLJANJE POLITIČKE STRANKE

Naziv političke stranke je: Stranka za Bosnu i Hercegovinu. Skraćeni naziv stranke je SBIH.

Stranka za Bosnu i Hercegovinu je Rješenjem broj: R-I-2/96 od 25.04.1996. godine upisana u registar Višeg suda u Sarajevu.

Sjedište političke stranke je u Sarajevu, Trg Fra Grge Martića 2/II<sup>1</sup>.

Lice ovlašteno za zastupanje stranke je Amer Jerlagić, predsjednik stranke.

Lice ovlašteno za podnošenje finansijskih izvještaja za 2019. godinu je Amer Jerlagić.

Prema podacima iz godišnjeg finansijskog izvještaja za 2019. godinu, organizacionu strukturu Stranke za Bosnu i Hercegovinu čine:

- Centrala SBIH,
- Fondacija SBIH,

<sup>1</sup> Stranka je dana 01.06.2021. godine Centralnoj izbornoj komisiji Bosne i Hercegovine dostavila obavijest o promjeni adrese, te je stranka na adresi Reisa Džemaludina Čauševića 2/I.

- 2 kluba poslanika SBIH<sup>2</sup>,
- RO SBIH S.Vakuf,
- 8 kantonalnih vijeća,
- gradski savjet SBIH Mostar,
- 65 općinskih/opštinskih odbora/savjeta i
- SBIH Banja Luka.

### 3. OPIS REVIZIJE

**Predmet revizije** je godišnji finansijski izvještaj za 2019. godinu, i to sljedećih organizacionih dijelova političke stranke:

- Centrala Stranke za Bosnu i Hercegovinu,
- Općinski odbor Stranke za Bosnu i Hercegovinu Zavidovići i
- Općinski savjet Stranke za Bosnu i Hercegovinu Konjic.

**Cilj revizije** je da se na osnovu provedenih revizijskih procedura pribave revizijski dokazi, koji će revizoru omogućiti da izrazi mišljenje o tome da li je Stranka za Bosnu i Hercegovinu u izvještajnom periodu postupila u skladu sa odredbama Zakona o finansiranju političkih stranaka.

**Obim revizije** finansijskih izvještaja Stranke za Bosnu i Hercegovinu obuhvata kontrolu finansijske dokumentacije i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta.

### 4. PRETHODNE KONTROLE I REVIZIJE

Revizija i pregled finansijskih izvještaja Stranke za Bosnu i Hercegovinu vršeni su u periodu od 2005. do 2018. godine, nakon kojih su izdati izvještaji o reviziji, odnosno izvještaji o pregledu sa mišljenjem revizora, nalazima i preporukama revizije.

Nakon izvršenog pregleda godišnjeg finansijskog izvještaja za 2018. godinu, Služba za reviziju je izdala Izvještaj o pregledu sa mišljenjem revizora, nalazima revizije i preporukama stranci da finansijska sredstva obezbijeđena za finansiranje stranke koristi u skladu sa statutom i programom utroška sredstava, da vodi evidenciju o primljenim priložima, da, u skladu sa članom 6. stav (2) Zakona, dobrovoljne priloge u novcu uplaćuje na transakcioni račun centrale političke stranke, da se ne finansira iz zabranjenih priloga, da poslovne knjige vodi u skladu sa računovodstvenim propisima, odnosno da vodi potpune evidencije o prihodima, rashodima i obavezama stranke, da finansijske izvještaje popunjava u skladu sa Pravilnikom o godišnjim finansijskim izvještajima političkih stranaka, da izvrši popis imovine i obaveza, te da provede odgovarajuća knjiženja u poslovnim knjigama i da dostavlja traženu dodatnu finansijsku dokumentaciju.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2019. godinu, utvrđeno je da Stranka za Bosnu i Hercegovinu nije ispoštovala ranije date preporuke.

---

<sup>2</sup> Klub poslanika FBiH i BiH.

## 5. NALAZI I PREPORUKE REVIZIJE

### 5.1 NALAZI

**a) Stranka za Bosnu i Hercegovinu nije postupila u skladu sa odredbama člana 4. stav (1) Zakona o finansiranju političkih stranaka<sup>3</sup>.**

Stranka za Bosnu i Hercegovinu je finansijska sredstva stranke utrošila bez programa utroška sredstava za 2019. godinu, čime je prekršila odredbe člana 4. stav (1) Zakona o finansiranju političkih stranaka.

Stranka za Bosnu i Hercegovinu je u godišnjem finansijskom izvještaju iskazala ukupne rashode u iznosu od 254.894,24 KM.

Uvidom u dokumentaciju utvrđeno je da stranka Plan utroška sredstava nije dostavila uz Godišnji finansijski izvještaj za 2018. godinu, a što je bila obavezna.

U toku obavljanja revizije stranka je na zahtjev predočila dokument o Planu utroška sredstava za 2019. godinu. Uvidom u isti utvrđeno je da na dokumentu nije upisan datum izrade niti kada je usvojen, te isti nije uzet u razmatranje.

**b) Stranka za Bosnu i Hercegovinu je prekršila odredbe člana 5. stav (4)<sup>4</sup> i člana 8. stav (1) tačka e) i g) Zakona o finansiranju političkih stranaka.**

(1) U toku revizije utvrđeno je da stranka u godišnjem finansijskom izvještaju i poslovnim knjigama nije prijavila nenovčane donacije, koje su ostvarili njeni niži organizacioni dijelovi po osnovu isknjižavanja obaveze prema dobavljaču „Elif“ Zavidovići u iznosu od 1.200,00 KM i korištenjem poslovnih prostora bez naknade, čime je prekršila odredbe člana 5. stav (4) Zakona o finansiranju političkih stranaka.

- Uvidom u poslovne knjige OO SBIH Zavidovići utvrđeno je da je navedeni odbor bez dokumentacije iz svojih poslovnih knjiga isknjižio obavezu prema dobavljaču „Elif“ Zavidovići u iznosu od 1.200,00 KM, koja je u poslovnim knjigama evidentirana po početnom stanju. Na taj način stranka je ostvarila nenovčanu donaciju u iznosu od 1.200,00 KM.
- Uvidom u akt Opštine Srebrenica broj: 01-014-341/20 od 02.06.2020. godine, utvrđeno je da je Općinski odbor SBIH Srebrenica, koristio prostor u vlasništvu Opštine Srebrenica u 2019. godini, površine 15,51 m<sup>2</sup>, bez naknade.
- Na osnovu akta Općine Jablanica, broj: 01-25-4-1076/20 od 28.04.2020. godine, utvrđeno je da je Općinski odbor SBIH Jablanica besplatno koristio prostor Općine Jablanica, površine 21,15 m<sup>2</sup>.
- Uvidom u akt Općine Hadžići, broj: 08-04-3-4727 od 26.06.2020. godine, utvrđeno je da je Općinski odbor SBIH Hadžići besplatno koristio prostor Općine Hadžići, površine cca 10 m<sup>2</sup>.

<sup>3</sup> U skladu sa odredbom iz člana 4. stav (1) Zakona o finansiranju političkih stranaka, stranka finansijska sredstva iz člana 3. stav (1) ovog Zakona može koristiti isključivo za ostvarivanje ciljeva utvrđenih svojim programom i statutom.

<sup>4</sup> Političke partije dužne su da vode evidenciju o prijemu članarina i dobrovoljnih priloga, te da izdaju potvrde o prijemu članarina i dobrovoljnih priloga. Ovlašćeno lice u političkoj stranci uplaćuje članarinu i dobrovoljne priloge neposredno na transakcijski račun političke stranke najkasnije u roku od 10 dana od dana prijema uplate.

- Na osnovu raspoložive dokumentacije utvrđeno je da je Općinski odbor SBIH Zavidovići koristio prostor Općine Zavidovići, bez naknade.

Stranka za Bosnu i Hercegovinu je korištenjem poslovnih prostora u vlasništvu općina, bez plaćanja zakupnine, primila nenovčane donacije, koje je u skladu sa Pravilnikom o godišnjim finansijskim izvještajima političkih stranaka i Zakonom o finansiranju političkih stranaka imala obavezu da evidentira u poslovnim knjigama i prijavi u godišnjem finansijskom izvještaju za 2019. godinu. Takođe, stranka je bila obavezna prijaviti i nenovčanu donaciju dobavljača „Elif“ Zavidovići.

- (2) Kontrolom finansijske dokumentacije utvrđeno je da Odbor SBIH Brčko članarine prikupljene u gotovom novcu, putem blagajne, u iznosu od 950,00 KM nije nikako uplatio na transakcijski račun Odbora SBIH Brčko, dok su članarine u iznosu od 135,00 KM, takođe prikupljene putem blagajne, položene nakon isteka roka od 10 dana od dana prijema uplate, čime su prekršene odredbe člana 5. stav (4)<sup>5</sup> Zakona o finansiranju političkih stranaka.
- (3) Stranka je tokom 2019. godine ostvarila novčanu donaciju u iznosu od 400,00 KM koju je stranci uplatio Kanton Tuzla iz svog budžeta, a po osnovu paušala, i nenovčanu donaciju besplatnim korištenjem poslovnog prostora koji je Općina Ključ dodijelila na korištenje Udruženju žena „Ključki biseri“ Ključ, a udruženje je prostor dodijelilo političkoj stranci.

- Uvidom u valutnu karticu transakcijskog računa KO SBIH Tuzla utvrđeno je da je u 2019. godini na ovaj transakcijski račun uplaćeno ukupno 400,00 KM<sup>6</sup> iz budžeta Kantona Tuzla po osnovu paušala. U postupku revizije stranka nije imala dokumentaciju iz koje se može vidjeti, odnosno zaključiti od čijih paušala su sredstva uplaćena stranci, odnosno ko je uplatio sredstva. Na taj način stranka je primila sredstva iz zabranjenih izvora u iznosu od 400,00 KM.

S obzirom da stranka nema podatke o donatorima, primila je zabranjeni prilog u iznosu od 400,00 KM, i time prekršila odredbe člana 8. stav (1) tačka e) Zakona o finansiranju političkih stranaka.

- Stranka, odnosno njen odbor u Ključu je u 2019. godini koristio poslovni prostor Udruženja žena „Ključki biseri“ Ključ, besplatno i time je ostvarila nenovčanu donaciju navedenog udruženja.

S obzirom da se Udruženje žena „Ključki biseri“ Ključ u toku 2019. godine finansiralo javnim sredstvima u iznosu od 1.000,00 KM<sup>7</sup>, navedena nenovčana donacija političkoj stranci je zabranjena u skladu sa odredbama iz člana 8. stav (1) tačka g) Zakona o finansiranju političkih stranaka<sup>8</sup>.

Stranka navedenu novčanu i nenovčanu donaciju nije evidentirala u svojim poslovnim knjigama i nije iskazala u godišnjem finansijskom izvještaju, čime je prekršila odredbe člana 5. stav (4) Zakona o finansiranju političkih stranaka.

Pored navedenog, u postupku revizije utvrđeno je da stranka fizičkim licima Safetu Smailbašiću i Mehmedu Mehimoviću, koji su dali prilog stranci u OO SBIH Doboj Istok, nije izdala potvrde o primljenoj donaciji, čime je prekršila odredbe člana 5. stav (4) Zakona o

<sup>5</sup> Ovlašteno lice u političkoj stranci uplaćuje članarinu i dobrovoljne priloge neposredno na transakcijski račun političke stranke najkasnije u roku od 10 dana od dana prijema uplate.

<sup>6</sup> Sredstva su uplaćena u četiri navrata po 100,00 KM.

<sup>7</sup> Akt općine Ključ broj: 01-11-1-227/21 od 02.02.2021. godine.

<sup>8</sup> U skladu sa odredbom iz člana 8. stav (1) tačka g) Zakona, finansiranje političkih stranaka zabranjuje se sindikatima, udruženjima i drugim neprofitnim organizacijama koje se finansiraju javnim sredstvima bez obzira na iznos sredstava.

finansiranju političkih stranaka i člana 6. Pravilnika o godišnjim finansijskim izvještajima političkih stranaka.

**c) Stranka je prekršila odredbu člana 6. stav (2) Zakona o finansiranju političkih stranaka.**

Revizijom je utvrđeno da prilozi fizičkih lica u OO SBIH Doboju Istok u iznosu od 591,80 KM nisu uplaćeni na transakcijski račun Centrale stranke, čime su prekršene odredbe člana 6. stav (2) Zakona o finansiranju političkih stranaka.

U skladu sa odredbama člana 6. stav (2) Zakona o finansiranju političkih stranaka, dobrovoljni prilozi u novcu uplaćuju se na transakcijski račun centrale političke stranke.

**Stranka je prekršila odredbe člana 11. i člana 12. stav (1) i stav (4) Zakona o finansiranju političkih stranaka<sup>9</sup>.**

Revizijom je utvrđeno da Stranka za Bosnu i Hercegovinu nije uspostavila sistem internih kontrola, nije vodila potpune evidencije o svojim prihodima, rashodima, obavezama, novčanim tokovima i nije postupila po principima blagajničkog poslovanja, niti je godišnji finansijski izvještaj popunila u skladu sa odredbama Pravilnika o godišnjim finansijskim izvještajima političkih stranaka (u daljem tekstu: Pravilnik), čime su prekršene odredbe člana 11. i člana 12. stav (1) i stav (4) Zakona o finansiranju političkih stranaka.

- (1) Stranka je godišnji finansijski izvještaj podnijela putem aplikacije „FI CIK BiH” dana 31.03.2020. godine, ali obrasce godišnjeg finansijskog izvještaja zajedno sa kopijom Završnog računa za 2019. godinu nije dostavila u roku, čime je prekršila odredbe člana 3. stav (1) Pravilnika.

Uvidom u službene evidencije utvrđeno je da stranka nije dostavila odštampane obrasce godišnjeg finansijskog izvještaja u PDF formatu iz aplikacije FI CIK BiH, na šta joj je u Zahtjevu za dostavljanje dodatne dokumentacije za 2019. godinu ukazano.

Stranka je postupila po zahtjevu i odštampane obrasce dostavila dana 11.11.2020. godine, odnosno nakon zakonom utvrđenog roka, čime je prekršila odredbe člana 3. stav (1) Pravilnika.

- (2) U postupku obavljanja revizije utvrđeno je da stranka nije uspostavila sistem internih kontrola, čime je prekršila odredbe člana 11. Zakona o finansiranju političkih stranaka.

- Na osnovu obavljene revizije utvrđeno je da stranka poslovne knjige vodi po odborima, ali da nema poslovne evidencije za sve odbore stranke, iako je za pojedine odbore utvrđen značajan promet sredstava.

Navedeno ukazuje da stranka nije vodila poslovne knjige za sve općinske odbore, što je u suprotnosti sa Zakonom o računovodstvu i reviziji Federacije BiH.

- Uvidom u finansijsku dokumentaciju i finansijsko poslovanje stranke, utvrđeno je da stranka nema uspostavljen sistem internih finansijskih kontrola nad nižim nivoima stranke, kao ni kontrolu nad trošenjem novčanih sredstava.

Stranka je donijela Pravilnik o finansijskom poslovanju stranke.

---

<sup>9</sup> U skladu sa odredbom člana 11. stav (1) Zakona o finansiranju političkih stranaka, politička stranka je dužna voditi poslovne knjige u skladu sa računovodstvenim propisima. U skladu sa odredbom iz člana 12. stav (1) Zakona dužna je uspostaviti evidencije o svim prihodima i rashodima, dok je u skladu sa odredbom iz člana 12. stav (4) dužna podnositi finansijski izvještaj u formi koju odobri Centralna izborna komisija Bosne i Hercegovine.



Bez obzira na navedenu činjenicu, u postupku revizije utvrđeno je da stranka ne provodi svoje interne akte, odnosno nema kontrolu na novčanim sredstvima nižih nivoa organizovanja i načinu trošenja istih. U finansijskom izvještaju za 2019. godinu stranka nije prijavila sve transakcijske račune kao ni promet ostvaren po istim, i nije iskazala i evidentirala sve prihode i rashode.

U skladu sa članom 11. stav (2) Zakona o finansiranju političkih stranaka, stranka je dužna da svojim internim aktima uredi sistem unutrašnje finansijske kontrole nad nižim organizacionim dijelovima radi sprečavanja pogrešnog evidentiranja prihoda i rashoda, te zloupotrebe finansijskih sredstava.

- (3) Uvidom u Izvještaj Centralne banke Bosne i Hercegovine i službene podatke o prihodima iz budžeta utvrđeno je da stranka u obrascu 2. finansijskog izvještaja (Pregled prometa svih transakcijskih računa političke stranke) nije prijavila sve transakcijske račune i u poslovnim knjigama nije evidentirala ostvarene promete po računima, čime je prekršila odredbe člana 11. Pravilnika.

- Uvidom u Izvještaj Centralne banke Bosne i Hercegovine utvrđeno je da stranka nije u finansijskom izvještaju iskazala transakcijske račune otvorene kod Naše banke a.d. Bijeljina i to račun broj: 5540110001116740 koji pripada OO Teslić putem kojeg nije ostvaren promet u 2019. godini i račun broj: 5540080001128818 koji pripada OO Brod i putem kojeg je stranka ostvarila sljedeći promet: početni saldo u iznosu od 3,05 KM, promet ulaza u iznosu od 16,95 KM, promet izlaza u iznosu od 13,90 KM i stanje na dan 31.12.2019. godine u iznosu od 6,10 KM.

Stranka nije iskazala ni transakcijski račun broj: 1415455320004081 otvoren kod Bosna Bank International d.d. Sarajevo i račun broj: 3060150000408381 otvoren kod Addiko Bank d.d. Sarajevo. Uvidom u potvrde banaka utvrđeno da u 2019. godini ni po jednom od navedena dva transakcijska računa nije ostvaren promet.

Takođe, stranka nije iskazala transakcijski račun broj: 1321102014596495 otvoren kod NLB banke d.d. Sarajevo koji pripada OO Kladanj, a putem kojeg je ostvaren sljedeći promet: početni saldo u iznosu od 15,50 KM, promet ulaza u iznosu od 34.541,45 KM, promet izlaza u iznosu od 34.556,95 KM. Stranka na dan 31.12.2019. godine nije imala sredstava na ovom računu.

Stranka nije iskazala ni pet transakcijskih računa otvorenih kod UniCredit bank i to:

1. transakcijski račun broj: 3389002206020861 sa sljedećim prometom: negativan početni saldo u iznosu od 15,00 KM, promet ulaza u iznosu od 13.280,21 KM, promet izlaza u iznosu od 13.357,02 KM i negativan saldo na dan 31.12.2019. godine u iznosu od 91,80 KM,
2. transakcijski račun broj: 5510040001110338 sa sljedećim prometom: promet ulaza u iznosu od 3.414,18 KM, promet izlaza u iznosu od 2.396,50 KM i stanje na dan 31.12.2019. godine u iznosu od 1.017,68 KM,
3. transakcijski račun broj: 5510010001160731 sa sljedećim prometom: početni saldo u iznosu od 162,28 KM, promet izlaza u iznosu od 30,00 KM i saldo na dan 31.12.2019. godine u iznosu od 132,28 KM,
4. transakcijske račune broj: 29010045001 i 29010045002 koji su bili otvoreni za potrebe depozita, a putem kojih, prema potvrdi banke, nije ostvaren promet u 2019. godini i

5. transakcijski račun broj: 5513031129116253 sa sljedećim prometom: početni saldo u iznosu od 231,85 KM, promet ulaza u iznosu od 0,01 KM, promet izlaza u iznosu od 231,86 KM.
- Na osnovu dostavljenih službenih podataka općina, gradova i kantona, utvrđeno je da stranka nije prijavila transakcijske račune i promet ostvaren nije evidentirala u svojim poslovnim knjigama.

Stranka nije prijavila četiri (4) transakcijska računa otvorena kod NLB banke i to:

1. transakcijski račun broj: 1321400310551502 koji pripada OO Kalesija, a putem kojeg je ostvaren sljedeći promet: početni saldo u iznosu od 520,00 KM, promet ulaza u iznosu od 1.285,00 KM i promet izlaza u iznosu od 1.805,00 KM. Stranka na dan 31.12.2019. godine nije imala sredstava na ovom računu.
2. transakcijski račun broj: 1321100309475593 OO Živinice, sa sljedećim prometom: početni saldo u iznosu od 1.978,57 KM, promet ulaza u iznosu od 7.515,06 KM, promet izlaza u iznosu od 8.026,97 KM i saldo na dan 31.12.2019. godine u iznosu od 1.466,66 KM.
3. transakcijski račun broj: 1321500310137404 koji pripada OO Srebrenik, sa sljedećim prometom: početni saldo u iznosu od 554,32 KM, promet ulaza u iznosu od 6.246,08 KM, promet izlaza u iznosu od 6.800,40 KM i stanje na dan 31.12.2019. godine u iznosu od 0,00 KM.
4. transakcijski račun broj: 1321000309545729 koji pripada KO Tuzla, sa sljedećim prometom: početni saldo u iznosu od 517,27 KM, promet ulaza u iznosu od 29.029,89 KM, promet izlaza u iznosu od 29.445,48 KM i saldo na dan 31.12.2019. godine u iznosu od 101,68 KM.

Stranka nije u finansijskom izvještaju iskazala transakcijske račune otvorene kod UniCredit bank i to račun broj: 3389002208943859 koji pripada OO Trnovo te putem kojeg je ostvaren sljedeći promet: početni saldo u iznosu od 329,82 KM, promet ulaza u iznosu od 2.000,01 KM, promet izlaza u iznosu od 2.329,83 KM i račun broj: 3389002209044448 koji pripada OO Hadžići putem kojeg je stranka ostvarila sljedeći promet: početni saldo u iznosu od 997,73 KM, promet ulaza u iznosu od 5.531,29 KM i promet izlaza u iznosu od 6.529,02 KM. Stranka na dan 15.11.2019. godine nije imala sredstava na ovom računu i isti je zatvoren.

U izvještaju stranka nije prijavila ni transakcijski račun broj: 1603605500020029 koji pripada OO Gračanica, a otvoren je kod Vakufske banke sa sljedećim ostvarenim prometom: promet ulaza u iznosu od 4.928,58 KM i promet izlaza u iznosu od 4.928,58 KM.

Pored navedenog, stranka za neke od neprijavljenih računa nije obezbijedila podatke o prometu tj. nije dostavila izvode, a za iste je utvrđeno, po osnovu službenih podataka o uplatama iz budžeta, da su imali promet u 2019. godini. Sljedeće transakcijske račune stranka nije prijavila i nije dostavila izvode:

- 5673631900094196 otvoren kod Sberbank a.d. Banja Luka;
- 3383002250218435 otvoren kod UniCredit bank;
- 1322700309771460 otvoren kod NLB banke, a pripada OO Teočak;
- 1990440001848433 a pripada OO Sanski Most i
- 1322200309633842 otvoren kod NLB banke.

- (4) Revizijom, a na osnovu raspoložive dokumentacije o blagajničkom poslovanju Centrale stranke, OO SBIH Zavidovići i OO SBIH Konjic, utvrđeno je da stranka nije pravilno

iskazala promet putem blagajne, da je isplate vršila bez odgovarajuće dokumentacije, te da nije postupala u skladu sa pravilima i principima blagajničkog poslovanja, te suprotno Uredbi o uslovima i načinu plaćanja gotovim novcem u Federaciji BiH.

Isto tako, a na osnovu izvoda sa transakcijskog računa OO SBIH Živinice utvrđeno je da je ovaj odbor u 2019. godini ostvario promet putem blagajne, a koji stranka nije iskazala u finansijskom izvještaju u obrascu 2.1 (Pregled stanja blagajne), čime je prekršila odredbe člana 12. Pravilnika.

- Uvidom u blagajničke naloge za isplatu, Centrale stranke, utvrđeno je da na istim nedostaju potpisi lica kojem su sredstva isplaćena. Na nalogu za isplatu u rubrici namjenjenoj za potpis lica koje je primilo novčana sredstva stoji koliko računa je primljeno na plaćanje. Iz navedenog nije moguće utvrditi kome su sredstva isplaćena putem blagajne.
- Uvidom u dokumentaciju OO SBIH Zavidovići, utvrđeno je da je stranka blagajničko poslovanje, odnosno blagajničke dnevnik vodila na mjesečnom nivou, a ne kada je promet ostvaren. Takođe, nalozi blagajne za isplatu ne sadrže podatke o licu kojem su sredstva isplaćena, dok na mjestu za potpis lica koje je primilo sredstva koja su putem blagajne isplaćena stoji identičan potpis na svakoj isplatnici. Pored navedenog, utvrđeno je da je stranka putem blagajne u mjesecu avgustu i septembru 2019. godine isplatila novčana sredstva u iznosima od po 200,00 KM pravnom licu TV Smart za usluge produkcije, a da za navedene isplate nije obezbijedila račune. Takođe, u istom periodu stranka je isplatila sredstva iz blagajne u iznosu od 318,00 KM bez odgovarajućeg fiskalnog računa, odnosno isplatila je sredstva za konzumaciju hrane i pića na osnovu paragon bloka Restorana Bosna.
- Uvidom u blagajničku dokumentaciju OO SBIH Konjic, utvrđeno je da je stranka, odnosno OO SBIH Konjic, u toku godine za plaćanja putem blagajne vršio podizanje novca sa transakcijskog računa OO SBIH Konjic i položio ih u blagajnu, iako je prema prethodnom saldu blagajne imao dovoljno novca u blagajni da bi izvršio plaćanja. Na taj način stranka je odstupila od propisa i principa blagajničkog poslovanja koji su regulisani Uredbom o uslovima i načinu plaćanja gotovim novcem u Federaciji BiH.<sup>10</sup>

Podizanje gotovine sa transakcijskog računa i njen polog na blagajnu vrši se u slučaju kada u blagajni nedostaju gotovinska sredstva za tekuće potrebe stranke.
- Uvidom u bruto bilans OO SBIH Živinice utvrđeno je da je ovaj odbor u 2019. godini putem blagajne ostvario promet: početno stanje u iznosu od 176,24 KM, promet ulaza u iznosu od 500,00 KM, promet izlaza u iznosu od 570,00 KM i stanje na dan 31.12.2019. godine u iznosu od 106,24 KM, a koji nije prijavila u godišnjem finansijskom izvještaju.

Na osnovu raspoložive dokumentacije utvrđeno je da OO SBIH Živinice nije postupao u skladu sa propisima i principima blagajničkog poslovanja, jer nema dnevnik blagajne sa nalogima i dokumentacijom u prilogu. Od blagajničke dokumentacije za OO SBIH Živinice stranka samo ima Dnevnik blagajne na dan 04.04.2019. godine sa prometom od 250,00 KM bez priloga, odnosno dokumentacije koja bi pratila ovaj novčani tok sredstava.

---

<sup>10</sup> „Službene novine Federacije BiH“, broj: 72/15.

- (5) Stranka za Bosnu i Hercegovinu u finansijskom izvještaju nije iskazala nenovčanu donaciju u iznosu od 1.200,00 KM dobavljača „Elif“ Zavidovići i nenovčane donacije po osnovu besplatnog korištenja poslovnih prostora, koje su stranci dodijelile općine Srebrenica, Jablanica, Hadžići i Zavidovići i Udruženje žena „Ključki biseri“ Ključ, čime je prekršila odredbe člana 13. i 18. Pravilnika.
- (6) U obrascu 3-a finansijskog izvještaja (Prilozi fizičkih lica) stranka je priloge fizičkih lica veće od 100,00 KM pogrešno iskazala kao priloge niže od 100 KM, čime je prekršila odredbe člana 14. Pravilnika.

Uvidom u dokumentaciju utvrđeno je da su stranci, odnosno OO SBIH u Doboj Istoku u 2019. godini priloge od svojih vijećničkih paušala dala dva vijećnika Safet Smailbašić u iznosu od 295,90 KM i Mehmed Mehimović u iznosu od 295,90 KM<sup>11</sup>, a što je stranka prijavila u jednom iznosu kao priloge fizičkih lica niže od 100 KM.

- (7) U obrascu 3-f finansijskog izvještaja (Prihodi iz budžeta) stranka nije iskazala sve prihode iz budžeta koje je primila u 2019. godini, čime je prekršila odredbe člana 19. Pravilnika.
- Stranka je u finansijskom izvještaju iskazala prihode iz budžeta Općine Hadžići u iznosu od 754,59 KM, dok je, uvidom u akt Općine broj: 04-11-3-1642-1/2020 od 27.11.2020. godine, utvrđeno da je navedena općina u 2019. godini iz budžeta stranci uplatila novčana sredstva u iznosu od 5.531,25 KM.
  - Stranka je prihode iz budžeta Općine Ilidža iskazala u manjem iznosu od ostvarenih za 1.141,99 KM.  
Na osnovu podataka koje je dostavila Općina Ilidža<sup>12</sup>, utvrđeno je da su Stranci za Bosnu i Hercegovinu u 2019. godini iz budžeta općine isplaćena sredstva u iznosu od 5.443,20 KM. Stranka je u obrascu 3-f finansijskog izvještaja iskazala prihod u iznosu od 4.301,21 KM, odnosno u manjem iznosu za 1.141,99 KM. Prema podacima iz dostavljenog akta Općine Ilidža, razliku čine troškovi zakupa poslovnih prostorija Općine koji koristi stranka i troškovi telefona.
  - Uvidom u akt Općine Sanski Most<sup>13</sup> utvrđeno je da su sredstva iz budžeta ove općine uplaćena stranci u 2019. godini u iznosu od 8.868,00 KM. Stranka u finansijskom izvještaju nije iskazala prihod iz budžeta ove općine.
  - Uvidom u akt Općine Gračanica<sup>14</sup> utvrđeno je da su sredstva iz budžeta ove općine uplaćena stranci u 2019. godini u iznosu od 4.928,58 KM. Stranka u finansijskom izvještaju nije iskazala prihod iz budžeta ove općine.
  - Stranka u finansijskom izvještaju nije iskazala prihod iz budžeta Općine Teočak, dok je, uvidom u akt Općine broj: 04-04-1400/20 od 30.11.2020. godine, utvrđeno da je navedena općina u 2019. godini iz budžeta stranci uplatila novčana sredstva u iznosu od 450,00 KM.
  - Stranka nije iskazala prihode iz budžeta Grada Srebrenik. Na osnovu podataka koje je dostavio Grad Srebrenik<sup>15</sup>, utvrđeno je da su Stranci za Bosnu i Hercegovinu u 2019. godini iz budžeta Grada Srebrenika isplaćena sredstva u iznosu od 4.993,66 KM.

<sup>11</sup> Izjave vijećnika po 10% od paušala.

<sup>12</sup> Akt Općine Ilidža, broj: 06-14-46/20-46 od 30.11.2020. godine.

<sup>13</sup> Akt Općine Sanski Most broj: 04-11-935/20 od 30.11.2020. godine.

<sup>14</sup> Akt Općine Gračanica broj: 05-11-04303-2020 od 30.11.2020. godine.

<sup>15</sup> Akt Grada Srebrenik, broj: 02-1-107/20 od 01.12.2020. godine.

Prema podacima iz dostavljenog akta Grada Srebrenika, dio sredstava u iznosu od 1.020,00 KM je uplaćen na račun Suljić Fahrudina po osnovu Ugovora o cesiji broj 01-18.

- Uvidom u akt Kantona Tuzla<sup>16</sup> utvrđeno je da su sredstva iz budžeta ovog kantona uplaćena stranci u 2019. godini u iznosu od 29.189,66 KM. Stranka u finansijskom izvještaju nije iskazala prihod iz budžeta ovog kantona.
- Stranka u finansijskom izvještaju nije iskazala prihod iz budžeta Općine Trnovo, dok je, uvidom u akt Općine Trnovo broj: 02/5-04-3525 od 03.12.2020. godine, utvrđeno da je navedena općina u 2019. godini iz budžeta stranci uplatila novčana sredstva u iznosu od 2.000,00 KM.
- Uvidom u akt Općine Lukavac<sup>17</sup> utvrđeno je da su sredstva iz budžeta ove općine uplaćena stranci u iznosu od 3.532,25 KM. Stranka u finansijskom izvještaju nije iskazala prihode iz budžeta Općine Lukavac.
- Stranka je prihode iz budžeta Općine Travnik iskazala u manjem iznosu od ostvarenih za 479,70 KM.

Na osnovu podataka koje je dostavila Općina Travnik<sup>18</sup>, utvrđeno je da su Stranci za Bosnu i Hercegovinu u 2019. godini iz budžeta ove općine isplaćena sredstva u iznosu od 8.537,55 KM. Stranka je u obrascu 3-f finansijskog izvještaja iskazala prihod u iznosu od 8.057,85 KM, odnosno u manjem iznosu za 479,70 KM.

Prema podacima iz dostavljenog akta Općine Travnik, razliku čine troškovi zakupa poslovnih prostorija Općine Travnik koji koriste OO i KV SBIH Travnik. Naime, Općina Travnik je zaključila sa strankom Sporazum o izmirenju duga po osnovu zakupa općinskih poslovnih prostora, u kojem su se dvije strane saglasile da se mjesečne tranše koje općina ima obavezu uplatiti za finansiranje stranke umanjati za mjesečni zakup u iznosu od 479,70 KM do izmirenja duga koji je na dan 30.06.2019. godine iznosio 20.387,25 KM.

- Uvidom u akt Općine Živinice<sup>19</sup> utvrđeno je da su u toku 2019. godine iz budžeta ove općine stranci uplaćena sredstva u iznosu od 7.548,40 KM. Stranka u finansijskom izvještaju nije iskazala prihod iz budžeta ove Općine Živinice.
- Stranka u finansijskom izvještaju nije iskazala prihod iz budžeta Općine Kalesija, dok je, uvidom u akt Općine broj: 02/1-2-11-129/21 od 18.01.2021. godine, utvrđeno da je navedena općina u 2019. godini iz budžeta stranci uplatila novčana sredstva u iznosu od 1.285,00 KM.
- Stranka u finansijskom izvještaju nije iskazala prihod iz budžeta Općine Čelić. Uvidom u akt Općine Čelić broj: 04-13-2592/19 od 30.07.2021. godine, utvrđeno da je navedena općina u 2019. godini iz budžeta stranci uplatila novčana sredstva u iznosu od 2.390,80 KM.

---

<sup>16</sup> Akt Kantona Tuzla broj: 07/1-11-26921/20 od 01.12.2020. godine.

<sup>17</sup> Akt Općine Lukavac broj: 04-11-1884/20-1 od 03.12.2020. godine.

<sup>18</sup> Akt Općine Travnik, broj: 06-14-14-300/20 od 07.12.2020. godine.

<sup>19</sup> Akt Općine Živinice broj: 03/9-11-269/20 od 10.12.2020. godine.

(8) Služba za reviziju je utvrdila da je stranka zbog neblagovremenih evidencija iskazala pogrešne podatke o rashodima u obrascima finansijskog izvještaja, čime je prekršila odredbe člana 21.,22. i 23. Pravilnika.

- Tokom obavljanja revizije, a na osnovu finansijske dokumentacije, utvrđeno je da stranka nema tačne podatke o svojim troškovima i obavezama.

1. Stranka je u finansijskom izvještaju iskazala troškove OO SBIH Zavidovići u iznosu od 1.109,58 KM, dok ukupni troškovi u poslovnim knjigama iznose 6.506,66 KM. Uvidom u račune OO SBIH Zavidovići utvrđeno je da stranka nije evidentirala ni sve račune.

U poslovnim knjigama stranka je evidentirala troškove telefona u iznosu od 53,76 KM, dok je uvidom u račune utvrđeno da su troškovi telefona iznosili 69,15 KM. Troškovi interneta, prema raspoloživim računima su iznosili 66,75 KM, a koje stranka nije nikako evidentirala. Troškovi električne energije su evidentirani u iznosu od 159,61 KM, a prema računima koji prate navedeni trošak, trošak električne energije iznosio je 138,03 KM. U finansijskom izvještaju trošak električne energije je iskazan u iznosu od 136,37 KM.

Troškove usluga stranka je iskazala u iznosu od 158,76 KM, a isti u poslovnim knjigama su evidentirani u iznosu od 2.245,24 KM. Isto tako, stranka je u poslovnim knjigama troškove reklame i propagande evidentirala u iznosu od 1.619,71 KM, dok u izvještaju navedeni troškovi nisu nikako iskazani. Za troškove propagande stranka nema račune.

2. Centrala stranke nije tačno i nije adekvatno iskazala svoje troškove.

U finansijskom izvještaju stranka je iskazala troškove usluga u iznosu od 46.625,96 KM. Uvidom u poslovne knjige utvrđeno je da troškove usluga čine: troškovi telefona, komunalne usluge, advokatske usluge i ostale usluge koje prema poslovnim knjigama iznose 17.317,81 KM, što je za 29.308,15 KM manje u odnosu na iskazane.

Kontrolom ostalih usluga utvrđeno je da je stranka u okviru ostalih usluga evidentirala, između ostalog, troškove u iznosu od 8.204,96 KM. Navedeni trošak je evidentiran po presudi Općinskog suda u Sarajevo, gdje je prema presudi pored sudskih troškova evidentiran i iznos glavnog duga nastao korištenjem usluga, što govori u prilog činjenici da stranka nema pravovremene evidencije o rashodima i obavezama. Centrala stranke u svojoj dokumentaciji ima samo jednu presudu suda za Hotele Ilidža, dok za 5.441,96 KM stranka nema knjigovodstvene isprave.

- Stranka u finansijskom izvještaju nije iskazala troškove za KO SBIH Tuzla.

Uvidom u izlazni promet izvoda po transakcijskom računu, koji nije prijavljen, utvrđeno je da je stranka ostvarila troškove vršeći plaćanja prema dobavljačima i licima angažovanim u stranci u ukupnom iznosu od 29.445,48 KM, a za koje stranka nema evidencije i dokumentaciju.<sup>20</sup>

Na isti način, uvidom u promet izvoda sa transakcijskih računa, utvrđeno je da je stranka ostvarila troškove u sljedećim organizacionim dijelovima stranke, koje nije prijavila u svom godišnjem finansijskom izvještaju i za koje nema nikakve evidencije i

<sup>20</sup> Stranka u GFI za 2018. godinu nije imala iskazane obaveze prema dobavljačima za KO SBIH Tuzla.

dokumentaciju: OO SBIH Gračanica u iznosu od 4.928,58 KM, OO Doboj u iznosu od 2.396,50 KM, Odbor stranke u Banjoj Luci u iznosu od 30,00 KM, OO SBIH Živinice u iznosu od 8.026,97 KM, OO SBIH Hadžići u iznosu od 5.088,99 KM i OO SBIH Trnovo u iznosu od 1.589,82 KM.

- Stranka je u poslovnim knjigama i finansijskom izvještaju za Centralu stranke iskazala troškove zakupa poslovnih prostora u iznosu od 36.204,31 KM. Revizijom je utvrđeno da su u navedenom iznosu troška zakupa, pored Centrale stranke za koju je stranka evidentirala i iskazala troškove zakupa u iznosu od 27.268,54 KM, iskazan i zakup za Gradski odbor SBIH Mostar u iznosu od 5.700,00 KM i Gradski odbor SBIH Bihać u iznosu od 3.235,77 KM, što je suprotno odredbama člana 22. Pravilnika.  
Stranka je imala obavezu da tako nastale troškove rasporedi po mjestu nastanka troška, odnosno iskaže po odborima.

Uvidom u ugovore o zakupu poslovnih prostora utvrđeno je da troškovi zakupa po osnovu ugovora nisu evidentirani i nisu iskazani za sljedeće odbore stranke: KO SBIH Tuzla u iznosu od 2.400,00 KM, OO SBIH Kalesija u iznosu od 144,00 KM, OO SBIH Živinice u iznosu od 582,72 KM, OO SBIH Ilidža u iznosu od 336,00 KM, OO SBIH Kakanj u iznosu od 2.301,60 KM, KV SBIH Travnik 2.460,00 KM, OO SBIH Sanski Most u iznosu od 312,00 KM, OO SBIH Jajce u iznosu od 648,84 KM, OO SBIH Donji Vakuf u iznosu od 1.200,00 KM, OO SBIH Doboj u iznosu od 113,64 KM i OO SBIH Gradačac u iznosu od 561,60 KM.

Takođe, utvrđeno je da su troškovi zakupa za sljedeće opštinske odbore evidentirani i iskazani u većem iznosu u odnosu na ugovorenu cijenu zakupa za ukupno 5.545,89 KM: Centrala stranke u iznosu od 2.097,58 KM, GO SBIH Mostar u iznosu od 2.100,00 KM, OO SBIH Bihać u iznosu od 132,65 KM, OO SBIH Konjic u iznosu od 237,46 KM, OO SBIH Tešanj u iznosu od 260,00 KM, OO SBIH Travnik u iznosu od 418,20 KM i O Brčko SBIH u iznosu od 300,00 KM, dok je utvrđeno da je Gradski odbor SBIH u Zenici troškove zakupa iskazao u manjem iznosu za 4.130,00 KM.

- Stranka je u 2019. godini po osnovu Odluka stranke izvršila plaćanje naknada za rad u stranci fizičkom licu u OO SBIH Konjic u iznosu od 6.300,00 KM i u OO SBIH Zavidovići u iznosu od 1.630,00 KM.

S obzirom da su navedene isplate izvršene u korist dva fizička lica, koja nisu zaposlena u stranci, iste imaju karakter ličnih primanja, na koja je sa poreznog aspekta stranka bila obavezna obračunati i uplatiti porez i doprinose, pa ih kao trošak iskazati u poslovnim knjigama i finansijskom izvještaju.

- Stranka je troškove kampanje iz 2018. godine u godišnjem finansijskom izvještaju iskazala kao troškove tekuće perioda, što ukazuje da ne vodi pravilne i ažurne evidencije o svojim troškovima i obavezama. Smatramo da stranka troškove kampanje iz prethodne godine nije trebala iskazati u obrascu 4.2 (troškovi propagande).

Uvidom u račune OO SBIH Kakanj, koji se odnose na troškove kampanje koji su u izvještaju iskazani u iznosu od 2.100,00 KM utvrđeno je da je stranka dio navedenih računa, koji se odnose na kampanju iz 2018. godine, platila u 2019. godini i tek tada je trošak nastao po tom osnovu prijavila u finansijskom izvještaju, čime je troškove iskazala suprotno odredbama člana 21. i 23. Pravilnika.

- (9) Stranka na kontu 128120-Potraživanja za date avanse na dan 01.01.2019. godine iskazuje početni saldo u iznosu od 11.358,40 KM. Činjenica da stranka u 2019. godini nije imala promet po navedenoj kartici, te da su potraživanja po osnovu datih avansa prenesena po

početnom stanju upućuje na to da stranka nije vršila usaglašavanje svojih obaveza sa dobavljačima, odnosno da računi nisu knjiženi u poslovnim knjigama u momentu nastanka troška.

(10) Stranka u poslovnim knjigama nije uspostavila tačne evidencije o svojim obavezama i nije iskazala sve svoje obaveze u obrascu 5 (obaveze političke partije) finansijskog izvještaja, čime je prekršila odredbe člana 24. Pravilnika.

- Tokom obavljanja revizije, a na osnovu dokumentacije Grada Srebrenika, utvrđeno je da je stranka na osnovu Ugovora o cesiji broj 01-18 ustupila svoje potraživanje u iznosu od 1.020,00 KM od Općine Srebrenik, po osnovu finansiranja iz budžeta, fizičkom licu Suljić Fahrudinu, prema kojem je stranka imala obavezu, te na taj način izmirila navedenu obavezu. Stranka nema knjigovodstvene evidencije o nastalim promjenama, niti je u godišnjem finansijskom izvještaju za 2018. godinu imala iskazanu obavezu prema navedenom fizičkom licu.

- Stranka je obaveze po pozajmicama u OO Srebrenica iskazala u iznosu od 1.936,08 KM. Uvidom u finansijsku dokumentaciju utvrđeno je da se navedene obaveze odnose na fizička i pravna lica, te da je stranka sa 31.12.2019. godine donijela Odluku o otpisu obaveza za pozajmice.

S obzirom da stranka nije u poslovnim knjigama za 2019. godinu evidentirala otpis obaveze po osnovu navedene odluke utvrđeno je da stranka ne sprovodi sopstvene odluke koje je donijela.

- Centrala SBIH je u godišnjem finansijskom izvještaju iskazala obaveze prema dobavljaču Općina Stari Grad u iznosu od 13.034,59 KM. Uvidom u Izvod otvorenih stavki na dan 31.12.2019. godine, utvrđeno je da navedeni dobavljač od stranke potražuje sredstva u iznosu od 10.487,90 KM.

U postupku revizije stranka nije obezbijedila izvode otvorenih stavki na dan 31.12.2019. godine za dobavljače Rabic i TV1, dok je za dobavljača Oslobođenje dostavila IOS na dan 22.06.2021. godine.

- Uvidom u službene podatke opština i gradova o korištenju poslovnih prostora utvrđeno je da stranka sa 31.12.2019. godine ima obaveze po osnovu zakupa prema Gradu Živinice u iznosu od 4.581,00, Općini Kakanj u iznosu od 5.899,54 KM i Općini Donji Vakuf za neplaćeni zakup za 2019. godinu u iznosu od 1.200,00 KM. Stranka u finansijskom izvještaju nije iskazala obaveze prema Gradu Živinice i Općini Donji Vakuf, dok je u OO Kakanj iskazana samo obaveza, bez navođenja dobavljača u iznosu od 6.353,42 KM.

Osim navedenog potrebno je ukazati i na to da je stranka u 2019. godini imala veći broj presuda po osnovu tužbi raznih dobavljača za neplaćanje obaveza i zaposlenih za neplaćanje plata i pripadajućih poreza i doprinosa, što potvrđuje navedenu konstataciju da stranka nema tačne podatke o svojim obavezama.



## 5.2. PREPORUKE

*Preporučuje se Stranci za Bosnu i Hercegovinu da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:*

- *da sačinjava plan utroška sredstava kako bi finansijska sredstva osigurana za finansiranje političke stranke koristila isključivo za ostvarivanje ciljeva utvrđenih svojim programom i statutom,*
- *da vodi evidenciju o priložima, bez obzira na koji način ih ostvaruje i izdaje potvrde o primljenim priložima,*
- *da dobrovoljne priloge u novcu uplaćuje na transakcijski račun Centrale stranke,*
- *da se ne finansira iz izvora koji su političkim strankama zabranjeni,*
- *da poslovne knjige vodi u skladu sa računovodstvenim propisima, te da uspostavi interne kontrole unutar stranke, odnosno kontrolu nad nižim organizacionim dijelovima stranke,*
- *da uspostavi blagovremene i potpune evidencije o prihodima, rashodima, obavezama i novčanim tokovima,*
- *da primjenjuje principe i pravila blagajničkog poslovanja,*
- *da finansijske izvještaje koje podnosi Centralnoj izbornoj komisiji Bosne i Hercegovine dostavlja u zakonom propisanom roku i na način utvrđen Pavilnikom o godišnjim finansijskim izvještajima političkih stranaka i*
- *da poštuje i druge propise, prevashodno poreske i propise o poslovanju gotovim novcem.*

*Takođe, preporučujemo:*

- *da vodi pomoćne knjige obaveza prema dobavljačima na pravilan način, te da izvrši usaglašavanje obaveza sa dobavljačima i provede odgovarajuća knjiženja u poslovnim knjigama,*
- *da uspostavi upravljanje gotovinom putem blagajne te da uvede obavezu vođenja blagajničkih izvještaja uz obavezne priloge (nalog uplate i nalog isplate; dokumenta na osnovu kojih se vrše isplate putem blagajne). Poslovanje blagajne treba urediti tako da se razgraniče dužnosti odobravanja isplate, evidentiranja i isplate gotovine, i*
- *da vrši redovan popis imovine i obaveza u skladu sa računovodstvenim propisima.*

### KOMENTAR:

Stranka za Bosne i Hercegovine se očitovala na nalaze revizije date u Preliminarnom izvještaju o reviziji godišnjeg finansijskog izvještaja za 2019. godinu.

U očitovanju stranka je dostavila izmjenjenu odluku o visini blagajničkog maksimuma i ugovor o zakupu OO Konjic.

Služba za reviziju je uvažila sve argumentovane primjedbe stranke, te je koriovala nalaze revizije iz Preliminaranog izvještaj o reviziji u dijelu koji se odnosi na visinu novčanih sredstava u blagajni i troškove zakupa OO Konjic.

Zahvaljujemo se zaposlenoj osobi zaduženoj za finansije i osoblju knjigovodstvenog biroa zadužen za vođenje poslovnih knjiga Centrale stranke na korektnoj saradnji tokom obavljanja revizije finansijskog izvještaja.

Šef Odsjeka za revizijske poslove

Sanja Tošović

Revizor

Veliborka Kenjić

Pomoćnik revizora

Anela Burdžović Kapić

Šef Službe za reviziju

Mr.sc Hasida Gušić